



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

PELAKSANAAN BENGKEL PENYELARASAN TANGGUNGJAWAB MEMBANTERAS KETIRISAN BARANG KAWALAN BERSAMA AGENSI- AGENSI PENGUATKUASAAN DI NEGERI SABAH

KOTA KINABALU, 22 FEBRUARI 2024 – Kementerian Perdagangan Dalam Negeri dan Kos Sara Hidup (KPDN) hari ini telah mengadakan Bengkel Penyelarasan Tanggungjawab Membanteras Ketirisan Barang Kawalan Bersama Agensi-Ageni Penguatkuasaan melibatkan 16 Agensi Penguatkuasaan Persekutuan dan Negeri. Agensi-agensi Penguatkuasaan yang terlibat adalah seperti berikut:

- I. Polis Diraja Malaysia (PDRM) meliputi Pasukan Gerakan Am, IPK Sabah dan Ketua-Ketua Polis Daerah seluruh Sabah;
- II. Jabatan Kastam Diraja Malaysia;
- III. Suruhajaya Pencegahan Rasuah Malaysia;
- IV. Jabatan Imigresen Malaysia;
- V. Jabatan Pendaftaran Negara;
- VI. Dewan Bandaraya Kota Kinabalu;
- VII. Eastern Sabah Security Command (ESSCOM);
- VIII. Jabatan Pengangkutan Jalan;
- IX. Jabatan Laut Malaysia;
- X. Bahagian Kawal Selia Padi dan Beras, Kementerian Pertanian dan Keterjaminan Makanan (KPKM);
- XI. Sabah Port Authority;
- XII. Agensi Penguatkuasaan Maritim Malaysia;
- XIII. Lembaga Minyak Sawit Malaysia (MPOB);
- XIV. Majlis Keselamatan Negara;
- XV. Jabatan Perhutanan Sabah; dan,
- XVI. Energy Commission Sabah (ECoS).

Tujuan bengkel ini diadakan adalah untuk memperkukuhkan penyelarasan dan kerjasama dalam penguatkuasaan membanteras ketirisan barang kawalan. Ini meliputi pelbagai aspek seperti keperluan logistik semasa tangkapan dan sitaan, bantuan keselamatan, perkongsian maklumat dalam dan serahan kes daripada pelbagai agensi kepada Bahagian Penguat Kuasa KPDN.

Pada masa yang sama, antara fokus utama bengkel adalah melihat kepada aspek meningkatkan ketangkasan pemantauan dan penguatkuasaan ketirisan subsidi bahan api/minyak diesel. Penambahbaikan mekanisme penguatkuasaan ini amat penting memandangkan Sabah dan Sarawak belum terlibat dalam perancangan penyasaran subsidi diesel di stesen-stesen minyak berbanding Semenanjung Malaysia yang dijangka akan bermula pada suku tahun kedua 2024.

Adalah menjadi tanggungjawab semua untuk memastikan isu ketirisan subsidi khususnya penyeludupan diesel di Sabah dan Sarawak dapat dikawal daripada terus berleluasa. Tindakan menyeleweng dan menyeludup barang-barang subsidi kerajaan adalah hakikatnya mengaut keuntungan daripada aktiviti perniagaan yang haram dan tidak sah sekali gus merampas hak rakyat dan dana awam.

Dalam hal ini, KPDN bersama semua agensi berkaitan telah memulakan OPS TIRIS yang bertujuan membanteras penyelewengan minyak diesel bersubsidi yang telah menyebabkan kerugian kepada negara dan menyebabkan bekalan bahan api itu tidak sampai kepada mereka yang selayaknya.

Berdasarkan statistik penguatkuasaan di bawah OPS TIRIS 1.0 dan 2.0 yang dilaksanakan mulai 1 Mac 2023 sehingga 31 Disember 2023, sebanyak 15,927 pemeriksaan telah dijalankan di seluruh negara merangkumi stesen minyak, pemborong, pengilang, kuari, pos kawalan dan lain-lain premis. Sejumlah 877 kes termasuk 386 kes serahan agensi telah dihasilkan dengan kuantiti rampasan sebanyak 6,441,118 liter minyak diesel bernilai RM14.2 juta, manakala nilai rampasan selain diesel berjumlah RM42.1 juta.

Seramai 554 orang warganegara tempatan, 112 orang warganegara asing dan 2 orang penduduk tetap telah ditahan yang menjadikan jumlah keseluruhan 668 orang. Bagi Negeri Sabah, sebanyak 1,026 pemeriksaan telah dilaksanakan dengan sejumlah 32 kes telah dihasilkan dengan nilai rampasan sebanyak RM1.05 juta dalam tempoh OPS TIRIS 1.0 dan 2.0.

Berdasarkan kejayaan positif yang telah ditunjukkan dalam pelaksanaan OPS TIRIS 1.0 dan 2.0 pada tahun 2023, pelaksanaan penguatkuasaan diteruskan melalui OPS TIRIS 3.0. Sepanjang penguatkuasaan OPS TIRIS 3.0 bermula 1 Januari hingga 15 Februari 2024, sejumlah 3,257 pemeriksaan telah dijalankan di seluruh negara dan berjaya menghasilkan sebanyak 330 kes dengan nilai rampasan sebanyak RM5.15 juta membabitkan rampasan minyak diesel sebanyak RM4.76 juta, petrol RON95 sebanyak RM90,611, LPG sebanyak RM154,189, minyak masak sebanyak RM107,759 dan gula sebanyak RM35,737.

Seramai 65 individu juga telah ditahan bagi siasatan lanjut di bawah Akta Kawalan Bekalan 1961 [Akta 122]. Manakala untuk Negeri Sabah, sebanyak 221 pemeriksaan telah dilakukan dengan bilangan kes yang dihasilkan sebanyak 29 dan jumlah rampasan barang kawalan bernilai RM192,845.

Melalui bengkel pada hari ini, beberapa perkara yang diperbincangkan untuk menambahbaik pelaksanaan OPS TIRIS 3.0 meliputi perkara seperti berikut:

- I. Meluaskan skop penguatkuasaan kepada barang-barang kawalan lain selain diesel seperti gula putih bertapis (kasar dan halus), minyak masak, bungkusan polibeg 1kg, tepung gandum, petrol RON95 dan gas petroleum cecair (LPG);
- II. Memperkukuh kerjasama dengan agensi penguatkuasaan di kawasan sempadan negara;
- III. Menambah baik Prosedur Operasi Standard (SOP) Kes Penyerahan Agensi daripada agensi-agensi penguatkuasaan lain;
- IV. Melaksanakan pemantauan dan pemeriksaan di premis-premis perniagaan melibatkan pemborong dan peruncit di sekitar kawasan sempadan;
- V. Melaksanakan pengauditan terhadap pemborong-pemborong diesel, pemegang permit barang kawalan, bunkering dan syarikat-syarikat pengeksport; dan
- VI. Melaksanakan inisiatif baharu Biz-Berkat yang bertujuan untuk meningkatkan kesedaran peniaga berkaitan kod etika dan peraturan perundangan perniagaan sekali gus menyuntik nilai berkat dalam perniagaan.

YB DATUK ARMIZAN MOHD ALI,
Menteri Perdagangan Dalam Negeri
dan Kos Sara Hidup.

###